

REPUBLIKA E KOSOVËS - REPUBLIKA KOSOVO KOMUNA E VUSHTRRIË-OPËSTINA VUÇITRN
Nr. / Br. <u>13246/26</u>
Nr. i fq. / Br. st. <u>-5-</u>
Data: / Datum: <u>31.03.2026</u>
VUSHTRRI - VUÇITRN



Republika e Kosovës
Republika Kosova – Republic of Kosovo
Komuna e Vushtrrisë
Opština Vuçitrn – Municipality of Vushtri



Kuvendi i Komunës

01 Nr. PB-57/26 31.03.2026

PROCESVERBAL
NGA MBLEDHJA SOLEMNE E KUVENDIT TË KOMUNËS SË VUSHTRRIË,
MBAJTUR MË: 5 MARS 2026

Mbledhja është mbajtur në sallën e "Kuvendit të Komunës së Vushtrrisë, dhe filloj në orën 11:10.

Në këtë mbledhje ishin të pranishëm anëtarët e Kuvendit të Komunës së Vushtrrisë: Berat Sadiku, Betim Grabanica, Blerina Shala, Diellza Pllana, Drita Dibrani, Edmond Hyseni, Gresa Muli, Isak Uka, Kushtrim Hyseni, Kushtrim Veseli, Melihate Basholli-Latifi, Mentor Hasani, Pllumb Maliqi, Refik Maloku, Rrahim Ajeti, Vlerë Tahiri, Xhon Gubetini dhe Ymer Haradinaj.

Munguan: Behar Duraku, Fakete Dushi, Fatmire Cecelia, Fidan Bejta, Gentiana Rama, Hava Rruka-Mlinaku, Leonora Gërguri, Mek Selaci, Mensur Kastrati, Mentor Ferizi, Nasuf Aliu, Ramadan Parduzi, dhe Stefan Markovic.

Të pranishëm në këtë mbledhje ishin edhe: Kryetari i komunës z. Ferit Idrizi, nënkryetari i komunës z. Shpëtim Zhergrova drejtorët e drejtorive komunale, Komandanti i Policës në Vushtri, kreu i Bashkësisë Islame në Vushtri, përfaqësuesit e shoqatave të dala nga lufta e UÇK-së, anëtarë të familjeve të dëshmorëve, përfaqësues të subjekteve politike në Vushtri, përfaqësuesit e KFOR-it dhe zyrtarë tjerë komunal.

Në fillim të mbledhjes u intonua himni kombëtar dhe ai shtetëror i Kosovës, në nderim të jetës dhe veprës së Komandantit Legjendar Adem Jashari, familjes së tij dhe Epopesë së UÇK-së.

Më pas kuvendi me një minutë heshtje nderoi jetën dhe veprën e Komandantit Legjendar Adem Jashari, familjes së tij dhe gjithë të rënëve për liri.

Melihate Basholli-Latifi, kryesuese e kuvendit–në adresimin e saj para kuvendi dhe qytetarëve të komunës së Vushtrrisë deklaroi: Jam e nderuar dhe thellësisht e privilegjuar të shpall të hapur këtë seancë të veçante solemne, kushtuar Epopesë së Ushtrisë Çlirimtare të Kosovës, rënies heroike të Komandantit Legjendar Adem Jashari, Familjes Jashari dhe të gjithë dëshmorëve, martirëve e të rënëve për lirinë e vendit tonë. Në këto ditë të 5, 6 dhe 7 marsit, kujtesa jonë kombëtare ndalet në Prekaz. Aty ku toka u njom me gjakun e bijave dhe bijve të saj, aty ku qëndresa u bë betim dhe sakrifica u bë dritë për një popull të tërë. Adem Jashari është mishërim i shpirtit të pathyeshëm të Kosovës. Ai është zëri që nuk pranoi të heshte, është qëndresa që nuk u përkul, është fjala “liri” e kthyer në jetë. Ai dhe familja e tij u bënë kushtrim për një popull që

kërkonte të zgjohej. Rënia e tyre nuk ishte fund, ishte rilindje. Nga flijimi i tyre mori hov të ri një luftë që nuk mund të ndalej më deri në çlirim. Sakrificë e familjes Jashari është një akt që e tejkalon kohën, është një testament që dëshmon se liria kërkon guxim, se dinjiteti kërkon qëndresë dhe se atdheu kërkon përkushtim deri në flajm. Ajo sakrificë u bë zemra që rrahu më fort se frika dhe drita që çau terrin e robërisë. Në këtë përvjetor ne përkujtojmë sakrificën sublime, botërisht unike, të familjes Jashari, e cila me guximin dhe vendosmërinë e saj u bë simbol i qëndresës dhe i luftës për çlirim. Kujtojmë me dhembje, krenari e përgjegjësi dëshmorët, martirët, të rënë e viktimat civile. Nderojmë me respekt të veçantë familjarët e dëshmorëve, veteranët e invalidët e luftës, të burgosurit politikë dhe të gjithë ata që kontribuan me përkushtim për çlirimin dhe shtetndërtimin e Kosovës. Epopeja e UÇK-së na mëson se liria është vepër e gjakut dhe e guximit. Ajo është amanet i shenjtë, i skalitur në kujtesën tonë kombëtare, andaj brez pas brezi e kemi për detyrë ta mbrojmë, ta forcojmë dhe ta lartësojmë atë. Sot, në përvjetorin e 28-të të Epopesë së UÇK-së, ndjejmë mungesën e figurave kyçe të saj, udhëheqësve që bartën mbi supet peshën e luftës dhe shpresën e popullit për çlirim. Ata po mbahen ende padrejtësisht prapa grilave. Besojmë thellësisht se lufta e UÇK-së ishte e drejtë dhe se e vërteta e saj është e gdhendur në ndërgjegjen tonë kombëtare. Historia nuk zhbëhet, sepse ajo është e shkruar me sakrificë dhe nuk rishkruhet. Sa herë që përmendim emrin e Adem Jasharit, sa herë që kujtojmë luftën e UÇK-së, ne zgjojmë brenda vetes një frymë. Një frymë që na thërret për unitet, për përgjegjësi dhe për përkushtim ndaj shtetit që lindi nga sakrificë. Le të jetë kjo seancë ripërtëritje e zotimit tonë. Të jemi të denjë për sakrificën e tyre. Të jemi roje të lirisë sonë. Të jemi ndërtues të së tashmes e të së ardhmes që ata e ëndërruan. Qoftë i përjetshëm nderimi dhe kujtimi për Komandantin Legjendar Adem Jashari dhe Familjen Jashari! Qoftë i përjetshëm kujtimi e nderimi për të gjithë dëshmorët, martirët dhe të rënë për lirinë e Kosovës! U bëfshim në brezi që e mban gjallë idealin e tyre, që e shndërron sakrificën në forcë dhe që ndërton një të ardhme të denjë mbi themelet e gjakut, guximit dhe dashurisë për atdheun.

Ferit Idrizi, kryetar i komunës- në adresimin e tij para kuvendi dhe qytetarëve të komunës së Vushtrrisë deklaroi: sot më 5 mars në këtë seancë solemne përulemi me respekt dhe mirënjohje të thellë para sakrificës së Komandantit legjendar Adem Jashari dhe familjes Jashari dhe të gjithë atyre që dhanë jetën për lirinë e Kosovës. Kjo datë shënon njërin nga faqet më të ndritura të historisë sonë, një akt pashembullt heroizmi dhe përkushtimi ndaj atdheut. Para 28 vitesh në Prekaz u vulos rruga jonë drejt lirisë me gjakun e të rënëve. Familja Jashari me sakrificën sublime na mësoi se liria nuk dhurohet, por fitohet me guxim, vendosmëri dhe dashuri të pakufishme për atdheun. Ata u bënë simbol i qëndresës, shembull i pavdekësisë dhe frymëzim për brezat që erdhën pas. Epopeja e lavdishme e Ushtrisë Çlirimtare të Kosovës nuk është vetëm një kujtim historik, por një amanet që na obligon të punojmë për një Kosovë më të zhvilluar, të jemi unik në situata kur duhet për vendin, për atdheun me të drejtë dhe më të fortë. Detyra jonë sot është të nderojmë këtë sakrificë duke e ndërtuar një të ardhme me të denjë për brezat që vijnë duke mbrojtur vlerat për të cilat ata ranë dhe duke punuar për forcimin e shtetit tonë. Sot në këtë 28 dhjetor të epopesë së lavdishme të Ushtrisë Çlirimtare të Kosovës, padrejtësisht mbahen prapa grilave me akuza tërësisht të fabrikuara, udhëheqësit e Ushtrisë Çlirimtare të Kosovës dhe udhëheqësit e shtetit të Kosovës Hashim Thaçi, Kadri Veseli, Jakup Krasniqi, Rexhep Selimi. Kjo është një padrejtësi e llojit të vetë, sepse lufta e Ushtrisë Çlirimtare ishte e drejtë, obliguese për popullin shqiptar e pastër dhe e mbështetur nga faktori ndërkombëtar nga aleanca Veri atlantike e udhëhequr nga Shtetet e Bashkuara të Amerikës. Ndaj në emër tim dhe të komunës së Vushtrrisë i shpreh mirënjohjen dhe falënderimin e thellë të gjithë atyre që na ndihmuan që sot këtë vend, këtë shtet ta kemi të lirë. Në emrin të komunës së Vushtrrisë shpreh nderimin dhe respektin më të

madh për të gjithë dëshmorët e kombit, martirët dhe të rënit për liri, për të gjithë ish të burgosurit politik. Lavdi e përjetshme veprës së komandantit legjendar Adem Jashari dhe familjes Jashari! Lavdi për të gjithë dëshmorët e kombit! Falënderim për të gjithë ata që kontribuan! Falënderim për Ushtrinë Çlirimtare të Kosovës dhe të gjithë ata që kontribuan për popullin e Kosovës që sot ta kemi këtë liri. Lavdi për të rënë për liri.

Gëzim Zuçaku, kryetar i shoqatës së familjeve të Dëshmorëve në Vushtrri- në adresimin e tij para kuvendi dhe qytetarëve të komunës së Vushtrrisë deklaroi: sot në këtë seancë solemni jemi mbledhur me nderim të thellë për ta kujtuar dhe përjetësuar një nga momentet më të lavdishme të historisë sonë kombëtare 5, 6 dhe 7 marsit të vitit 1998 me përlujtje dhe krenari kujton ditët kur në Prekaz u shkrua epopeja më e ndritur në historinë tonë kombëtare. Këto janë ditët kur në historinë e Kosovës u hap një kapitulli i lavdisë, i sakrificës dhe i qëndresës së pashembullt. Në ato ditë zjarri, i betejës në Prekaz, u bë simbol i pavdekshëm i guximit dhe i dashurisë për atdheun. Në krye të kësaj qëndrese heroike qëndronte komandanti legjendar Adem Jashari i cili bashkë me familjen e tij zgjodhi rrugën më të vështirë por më të lavdishme rrugën e sakrificës për lirinë e Kosovës. Për tre ditë e dy netë familja Jashari bëri ballë një makinerie të tërë ushtarake. Ata nuk u dorëzuan sepse e dinin liria nuk dhurohet. Ajo fitohet me sakrificë dhe me gjak. Në atë betejë të pabarabartë ata i treguan botës që shqiptari mund të vritet por nuk mund të nënshtrohet. Shtëpia e Jasharve në Prekaz u kthye në një kala të lirisë. Aty u shkrua një epope që do të kujtohet për jetë në historinë e popullit shqiptar. Sakrificat e tyre u bë dritë e shpresë për një popull të tërë dhe një kushtim për t'u ngritur në luftë për liri. Nga gjaku i familjes Jashari u ngrit zëri i fuqishëm i Ushtrisë Çlirimtare të Kosovës. Nga ajo sakrificë u bashkua populli shqiptar në një qëllim të vetëm, çlirimin e Kosovës dhe forcimin e shtetit tonë. Epopeja e Prekazit nuk ishte vetëm një ngjarje historike. Ajo është një amanet i shenjtë për të gjithë ne. Është kujtesa që liria e Kosovës është ndërtuar mbi sakrificën më të madh, mbi jetën e bijave dhe bijve më të mirë të këtij vendi. Sot kur kujtojmë këto ditë të mëdha përullem me respekt të thellë para dëshmorëve tanë dhe para familjes Jashari. Ata ranë për të mos vdekur kurrë sepse emrat e tyre janë shkruar përgjithmonë në historinë në zemrat e popullit shqiptar. Detyra jonë sot është ta ruajmë këtë amanet, ta ruajmë lirinë, ta duam Kosovën dhe ta ndërtojmë një shtet të fortë e të drejtë ashtu siç e ëndërruan ata që e dhanë jetën për këtë vend. Sepse një popull që i nderon dëshmorët e vet dhe nuk i harron sakrificën e tyre është një popull që nuk mposhtet kurrë. Prandaj sot me krenari dhe respekt të madh them me zë të lartë Lavdi përjetë komandantit legjendar Adem Jasharit dhe familjes së tij. Lavdi të gjithë dëshmorëve të Ushtrisë Çlirimtare të Kosovës. Rroftë Ushtria Çlirimtare e Kosovës, respekt deri në përlujtje para çlirimtarëve dhe invalidët e luftës.

Vlerë Tahiri, anëtare e kuvendit- në adresimin e saj para kuvendi dhe qytetarëve të komunës së Vushtrrisë deklaroi: Unë i përkas një brezi që ka lindur pas luftës. Nuk kam kujtime personale nga ato ditë. Gjithçka që di për atë kohë janë tregimet, kujtimet dhe mësimet që i kam dëgjuar gjatë viteve. I kam dëgjuar nga familjarët e mi, nga njerëzit që e kanë përjetuar luftën dhe që e mbajnë ende në kujtesë atë kohë të vështirë. I kam dëgjuar nga rrëfimet e atyre që e kanë parë nga afër sakrificën dhe qëndresën e popullit tonë. Për ato ngjarje kam mësuar edhe përmes librave të historisë, dokumentarëve, kronikave dhe dëshmi që janë ruajtur ndër vite. Dhe nga të gjitha këto rrëfime, nga të gjitha këto kujtime dhe dëshmi, një gjë mbetet e qartë: respekti dhe mirënjohja e thellë për atë ushtri dhe për atë familje që u bënë simbol i qëndresës dhe i sakrificës për lirinë e Kosovës. Por edhe pse nuk i kam përjetuar ato ditë, ka vende që ta bëjnë historinë të ndihet shumë më afër. Kur qëndron te Kulla e Jasharëve dhe pranë varrezave të tyre, e kupton se aty nuk është vetëm një vend historik – aty është dëshmia e një sakrifice të jashtëzakonshme. Sakrificat e një familjeje që nuk e kishte frikë vdekjen, nëse ajo vinte me çmimin e lirisë. Ta mendosh se ata u

flijuan duke e ditur se lirinë nuk do ta shijonin vetë, është një mendim që të jep një ndjenjë të thellë përgjegjësie. Të bën ta kuptosh se liria që ne e gëzojmë sot nuk është e rastësishme, por është rezultat i një sakrifice të madhe që dikush tjetër e bëri për ne. Ushtria Çlirimtare e Kosovës është ushtria që arriti ta bëjë realitet përpjekjen shekullore të popullit tonë për liri. Ajo ishte momenti kur një popull vendosi se robëria nuk është më një opsion. Nëse duhet të mësojmë diçka nga ato ngjarje, është kjo: të mos e lëshojmë njëri-tjetrin kur vendi ynë ka nevojë. Të mos e lëshojmë njëri-tjetrin kur integriteti i vendit tonë vihet në provë. Sepse të gjithë duhet ta dimë se i takojmë një Kosovë që është e ujitur me gjak. Dhe kjo nuk është vetëm një fjali historike – kjo është një përgjegjësi që bie mbi secilin prej nesh. Ne sot kemi vetëm një detyrë: të bëjmë krenarë ata që dhanë jetën për këtë Kosovë. E krenarë mund t'i bëjmë vetëm nëse, kur vjen puna te atdheu, jemi një. Një në qëndrim. Një në përgjegjësi. Dhe një në mbrojtjen e Kosovës. Sepse vetëm kështu mund të jemi të denjë për sakrificën e tyre. Lavdi e përjetshme Komandantit Legjendar Adem Jashari, Lavdi familjes Jashari, Lavdi të gjithë dëshmorëve të kombit.

Ymer Haradinaj, anëtar i kuvendit- në adresimin e tij para kuvendi dhe qytetarëve të komunës së Vushtrrisë deklaroi: Sot jemi mbledhur për të përkujtuar një nga ngjarjet më të rëndësishme të historisë sonë kombëtare, Epopenë e Ushtrisë Çlirimtare të Kosovës. Më 5,6 dhe 7 mars të vitit 1998 tre breza të familjes Jashari 59 veta gjithsej u flijuan për çlirimin e Kosovës dhe për lirinë e saj. Kjo epopë shënon sakrificën sublime të familjes heroike të Adem Jasharit si dhe të gjithë dëshmorëve që dhanë jetën për lirinë e Kosovës. Marsi në Kosovë nuk është thjesht një muaj në kalendar, por një kujtesë e përhershme e sakrificës, heroizmit dhe vendosmërisë së popullit për liri. Në kohët më të errëta, familja, familja Jashari ndezën dritën e shpresës. Në sfidat më të mëdha ata gjetën forcën për të ecur përpara. Në momentet kur liria dhe e ardhmja e Kosovës u vë në pikëpyetje, ata u bënë përgjegjësia, mburoja dhe zemra e këtij vendi. Në Prekaz u shkrua një nga faqet më të ndritura të historisë së popullit tonë, ku liria u pagua me gjakun e bijve dhe bijave më të mira të vendit. Epopeja e UÇK-së nuk është vetëm një histori. Është mësim për brezat e rinj se liria ka çmim dhe se ajo ruhet me përkushtim punë dhe dashuri për atdheun. Lavdi kryekomandantit legjendar Adem Jashari. Lavdi të rënëve në Prekaz më 5, 6 dhe 7 mars 1998. Lavdi të gjithë dëshmorëve të kombit!

Berat Sadiku, anëtar i kuvendit- në adresimin e tij para kuvendi dhe qytetarëve të komunës së Vushtrrisë deklaroi: sot jemi mbledhur për të përkujtuar një nga kapitujt më të lavdishëm dhe më të dhimbshëm të historisë sonë, Epopenë e UÇK-së dhe rënien heroike të Komandantit Legjendar Adem Jashari, familjes Jashari dhe gjithë dëshmorëve e martirëve të kombit. Epopeja e Ushtrisë Çlirimtare të Kosovës, e lidhur përjetësisht me Prekazin heroik dhe me Prekaz, nuk është vetëm një ngjarje historike; ajo është themeli mbi të cilin u ngrit liria jonë; ajo është dëshmi e sakrificës sublime, e vendosmërisë së pathyeshme dhe e dashurisë së pakushtëzuar për atdheun. Në marsin e vitit 1998, kur forcat serbe rrethuan kullat e Jasharajve, aty nuk u zhvillua thjesht një betejë; aty u vulos një epokë. Komandanti Legjendar Adem Jashari zgjodhi qëndresën deri në flajm, duke u bërë simbol i përjetshëm i rezistencës sonë kombëtare. Bashkë me të ranë anëtarë të familjes së tij: gra, pleq e fëmijë, duke e kthyer sakrificën e tyre në një thirrje të fuqishme për liri. Rënia e familjes Jashari nuk e trembi popullin e Kosovës, përkundrazi, e zgjoi dhe e bashkoi atë. Nga ajo ditë, mijëra djem e vajza iu bashkuan radhëve të UÇK-së, duke e shndërruar luftën për liri në një vullnet mbarëpopullor. Sot, kur përulemi me respekt para veprës së tyre, ne nuk kujtojmë vetëm dhimbjen; ne kujtojmë krenarinë; kujtojmë guximin; kujtojmë besimin se liria ka çmim dhe se ky çmim u pagua me gjakun më të shtrenjtë. Dëshmorët e kombit, martirët dhe të rënë për liri janë themeli moral i shtetit tonë. Ata nuk kërkuan asgjë për vete; ata dhanë gjithçka për ne. Prandaj, përgjegjësia jonë sot është ta ruajmë dhe ta forcojmë shtetin për të cilin ata u flijuan. Ta ndërtojmë me drejtësi,

me barazi, me zhvillim dhe me dinjitet. Si qytetarë, si përfaqësues institucionalë dhe si brezi që gëzon frytin e sakrificës së tyre, kemi obligim që kujtesën ta mbajmë të gjallë jo vetëm me fjalë, por me vepra. Të punojmë për unitet, për forcimin e institucioneve dhe për një të ardhme më të mirë për fëmijët tanë. Epopeja e UÇK-së nuk është vetëm histori; ajo është amanet. Lavdi e përjetshme Komandantit Legjendar Adem Jashari! Lavdi familjes Jashari! Lavdi të gjithë dëshmorëve, martirëve dhe të rënëve për lirinë e Kosovës!

Diellza Pllana, anëtare e kuvendit- në adresimin e saj para kuvendi dhe qytetarëve të komunës së Vushtrrisë deklaroi: sot jemi mbledhur për të kujtuar 5, 6 dhe 7 marsin e vitit 1998 që mbetën ndër ditët më të dhimbshme dhe më krenare të historisë sonë. Sot jemi këtu për t'u përgjatur me nderim të thellë para sakrificës së familjes Jashari dhe para figurës madhështore të komandantit legjendar Adem Jashari, simbol i qëndresës dhe i lirisë tonë. Epopeja e UÇK-së nuk është vetëm histori, ajo është plagë, është dhimbje, është krenari. Unë si edhe disa kolegë të mi këtu në kuvend gjithashtu i përkasim gjeneratës së lirisë, gjeneratës e cila është rritur me rrëfimet e përjetimeve të luftës. Ne nuk i kemi përjetuar as netët e tmerrit e as nuk i kemi dëgjuar zhurmët e armëve, mirëpo jemi rritur me historitë mbi to. Ne jemi rritur me emrat e dëshmorëve nëpër shkolla, me fotografitë e tyre nëpër mure, me heshtjen e dhimbshme e të heshtur të familjarëve që dhanë më të shtrenjtët e tyre për lirinë që gëzohemi ne sot. Në një kohë kur bota po përballet me konflikte të reja, me tensione dhe pasiguri, populli ynë më mirë se çdo popull tjetër e din se sa e brishtë është paqja. Ne e dimë shumë mirë se liria nuk është e përhershme nëse nuk mbrohet çdo ditë me unitet, me maturi dhe mbi të gjitha me institucione të forta. Mesazhi ynë sot duhet të jetë i qartë. Nderimi për të rënë nuk bëhet vetëm me fjalë, por me veprime, me drejtësi, me përgjegjësi publike, me vendime që e forcojnë Kosovën dhe i shërbejnë çdo qytetari pa dallim. Sakrifika e tyre na obligon të jemi më të bashkuar se kurrë mbi çdo ndarje politike. Lavdia e Dëshmorëve është e përjetshme. Detyra jonë është ta bëjmë Kosovën çdo ditë e më të denjë për sakrificën e tyre. Lavdi Epopesë së UÇK-së, Lavdi të Rënëve për Liri! Lavdi Kosovës!

Mbledhja përfundoj në ora 12:40

Bastri Duraku


Procesmbajtës



Melihate Basholli-Latifi


Kryesuese e Kuvendit